



BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
**PREDSTAVNIČKI DOM**

Broj:01-011-830/01

Sarajevo, 28.decembra 2001.

**Z A P I S N I K**

sa 18. sjednice Predstavničkog doma Parlamentarne skupštine  
Bosne i Hercegovine,

Osamnaesta sjednica održana je 13. i 28. decembra 2001.godine.

Prvi dio sjednice 13. decembra počeo je s radom u 15,45 sati, poslije završetka 17.sjednice Doma. Prisustvovalo je 35 poslanika. Odsustvo su opravdali Mirko Banjac, Zoran Spasojević, Mirko Mijatović, Tihomir Gligorić i Hilmo Neimarlija. Amor Mašović odsustvovao je bez najave.

Pored poslanika sjednici su prisustvovali predstavnici Vijeća ministara, a iz međunarodnih organizacija Jan Peter Hoteldalh-politički savjetnik u OHR-u.

Na početku sjednice predsjedavajući Željko Mirjanić upoznao je poslanike da je Kolegij u proširenom sastavu prije početka sjednice Doma utvrdio promjenu redoslijeda tačaka dnevnog reda, pa je o tome upoznao poslanike. Naglasio je da je iz prijedloga dnevnog reda skinut Prijedlog zakona o državnoj službi u institucijama BiH na prijedlog Vijeća ministara.

Poslije kraće diskusije Mire Grabovca, za 18. sjednicu jednoglasno je usvojen slijedeći

**D N E V N I R E D**

1. Zapisnik sa 16.sjednice Predstavničkog doma,
2. Izvještaj Zajedničke komisije o postizanju sporazuma o jedinstvenom tekstu Zakona o ličnoj karti državljana BiH,
3. Prijedlog zakona o izmjenama i dopunama Zakona o carinskoj tarifi BiH (drugo čitanje),
4. Prijedlog zakona o važnosti javnih isprava u Bosni i Hercegovini (drugo čitanje),
5. Prijedlog zakona o Pravobranilaštvu Bosne i Hercegovine (prvo čitanje),
6. Prijedlog o registraciji pravnih lica osnovanih od institucija Bosne i Hercegovine (prvo čitanje),
7. Prijedlog zakona o upravnim sporovima (prvo čitanje),
8. Prijedlog zakona o deminiranju u Bosni i Hercegovini (prvo čitanje),
9. Prijedlog zakona o slobodnim zonama u Bosni i Hercegovini (prvo čitanje),
10. Izvještaj Komisije za ljudska prava, imigraciju, izbjeglice i azil o posjetama jednom broju opština u Bosni i Hercegovini,

11. Davanje saglasnosti za ratifikaciju:
  - a) Sporazuma između Bosne i Hercegovine i Islamske Republike Pakistan za unapređenje i zaštitu investicija,
  - b) Trgovinskog sporazuma između Bosne i Hercegovine i Islamske Republike Pakistan,
12. Poslanička pitanja i odgovori.

**Ad. - 1:** Zapisnik sa 16.sjednice Predstavničkog doma

O Zapisniku s 16.sjednice nije bilo diskusije. Od 35 prisutnih poslanika ZA zapisnik su glasala 33 poslanika, a dva poslanika nisu glasali.

**Ad. - 2:** Izvještaj Zajedničke komisije o postizanju sporazuma o jedinstvenom tekstu Zakona o ličnoj karti državljana BiH

Član Zajedničke komisije Sead Avdić upoznao je Dom o Izvještaju te komisije o usaglašavanju teksta Zakona o ličnoj karti.

Predsjedavajući Kluba poslanika SDA Adem Borić upoznao je Dom da taj klub ne može prihvatiti amandman na član 6. stav 3., po kojem se iza riječi “matičnoj državi” dodaju riječi “i državljanstvo entiteta”.

Predsjedavajući Mirjanić je, poslije prednjih diskusija, Izvještaj dao na glasanje.

Od 35 prisutnih ZA je glasalo 25, protiv 6, a uzdržala se 3 poslanika.

Glasajući po entitetima, iz Federacije BiH ZA je glasalo 20, iz Republike Srpske 6 poslanika.

Ovim je Zakon o ličnoj karti državljana Bosne i Hercegovine usvojen u Parlamentarnoj skupštini.

Predsjedavajući Mirjanić je, nakon usvajanja Izvještaja Zajedničke komisije, upoznao Dom da se Kolegij sa predsjedavajućim klubova poslanika, dogovorio da se 18. sjednica poslije ove tačke prekine, a da će Kolegij nastavak sazvati do kraja godine.

Prvi dio sjednice završen je u 15,30 sati.

**Nastavak 18. sjednice održan je 28. decembra 2001.godine s početkom u 14 sati.** Prisustvovala su 33 poslanika. Odsustvovali su Adem Borić, Amor Mašović, Mirko Baković, Halil Mehtić, Ljubomir Kovačević, Franjo Majdandžić i Ibrahim Đedović.

Predsjedavajući Željko Mirjanić obavijestio je poslanike da je poslanik Ibrahim Đedović obavijestio Kolegij da je sjednicu napustio u znak protesta zbog kašnjenja početka sjednice. Potom je poslanike upoznao o razlozima zakašnjenja početka sjednice, rekavši, pored ostalog, da je Vijeće ministara predložilo da se u nastavak sjednice uvrste određene nove tačke, te se vršilo usaglašavanje i čekalo da Vijeće ministara završi svoju dopunjenu sjednicu. Naglasio je da su poslanici na klupe dobili prečišćeni i nešto izmijenjeni i dopunjeni dnevni prijedlog dnevnog reda, u odnosu na onaj usvojeni na početku 18. sjednice, te da su se predsjedavajući poslaničkih klubova o tome usaglasili.

Povodom novog prijedloga dnevnog reda diskutovali su: Damir Mašić, Marko Amidžić, Osman Brka Mirko Banjac, Mirko Mijatović, Boro Bjelobrk, Željko Bilbija, kao i ministar za trezor institucija BiH Ante Domazet i zamjenik ministra vanjske trgovine i ekonomskih odnosa Jadranko Prlić.

Poslije diskusije predsjedavajući Mirjanić je dao na glasanje prijedlog dopunjenog dnevnog reda.

Od 30 prisutnih ZA je glasalo 28 poslanika, jedan je glasao protiv, jedan se suzdržao. Prema tome, na nastavku 18.sjednice usvojen je slijedeći

### **D N E V N I R E D:**

1. Zapisnik sa 16. sjednice Predstavničkog doma,
2. Izvještaj zajedničke komisije o postizanju sporazuma o jedinstvenom tekstu Zakona o ličnoj karti državljanina BiH,
3. Prijedlog zakona o izmjenama i dopunama Zakona o carinskoj tarifi BiH (drugo čitanje),
4. Prijedlog zakona o važnosti javnih isprava u Bosni i Hercegovini (drugo čitanje),
5. Prijedlog zakona o Pravobranilaštvu Bosne i Hercegovine (prvo čitanje),
6. Prijedlog zakona o registraciji pravnih lica osnovanih od institucija Bosne i Hercegovine (prvo čitanje),
7. Prijedlog zakona o deminiranju u Bosni i Hercegovini (prvo čitanje),
8. Prijedlog zakona o slobodnim zonama u Bosni i Hercegovini (prvo čitanje),
9. Izvještaj Komisije za ljudska prava, imigraciju, izbjeglice i azil o posjetama jednom broju opština u Bosni i Hercegovini,
10. Davanje saglasnosti za ratifikaciju:
  - a) Sporazuma o razvojnom kreditu (Treći projekat obnavljanja u sektoru električne energije) između Bosne i Hercegovine i Međunarodne asocijacije za razvoj,
  - b) Sporazuma između Bosne i Hercegovine i Islamske Republike Pakistan za unapređenje i zaštitu investicija,
  - c) Trgovinskog sporazuma između Bosne i Hercegovine i Islamske Republike Pakistan,
11. Imenovanje članova Zajedničke komisije radi postizanja sporazuma o jedinstvenom tekstu Zakona o industrijskom vlasništvu u Bosni i Hercegovini,
12. Poslanička pitanja i odgovori.

Kako su na prvom dijelu sjednice završene 1. i 2. tačka, sjednica je nastavila rad na 3. tački dnevnog reda.

#### **Ad. - 3:** Prijedlog zakona o izmjenama i dopunama Zakona o carinskoj tarifi BiH (drugo čitanje)

Predsjedavajući Željko Mirjanić u uvodu je podsjetio poslanike da su blagovremeno podnijeli amandmane poslanik Senad Šarganović i Klub poslanika PDP-SNS-SNSD/DSP-SPRS i da ih brane u plenarnoj fazi; da su neblagovremeno amandmane podnijeli Branislava Ferzanović i Zoran Spasojević; da su poslanici Osman Brka, Mustafa Cuplov, Mariofil Ljubić i Miro Grabovac Titan podnijeli amandmane pozivom na član 94. tačka 3.a), te da je Kolegij prihvatio da i ovi amandmani idu u proceduru.

U raspravi o amandmanima učestvovali su Mustafa Cuplov, Bogić Bogičević, Osman Brka, Željko Bilbija, Zoran Spasojević, Ramiz Vilić, Mariofil Ljubić, Sead Avdić, Miro Grabovac i Mirko Banjac. U ime predlagača zakona govorio je Jadranko Prlić.

Poslije diskusije predsjedavajući je konstatovao da se Dom treba izjasniti o amandmanima koje predlagači ne povuku, pa je pozvao podnosiocima amandmana da se izjasne da li i poslije diskusije ostaju pri istim.

S obzirom na izneseni prijedlog zaključka u diskusiji, da se obaveže Vijeće ministara da što prije pripremi izmjene i dopune Zakona o carinskoj tarifi, amandmane su povukli poslanici Senad Šarganović, Klub poslanika PDP-SNS-SNSD/-SPRS, Osman Brka, Zoran Spasojević, te Mariofil Ljubić od drugog amandmana.

Dom se izjasnio o prvom amandmanu Mariofila Ljubića, te o amandmanima Mire Grabovca.

ZA amandman g. Ljubića, od 34 prisutna ZA je glasalo 7, protiv 22, uzdržala se 4 poslanika. Amandman, prema tome, nije usvojen.

Također nisu usvojeni ni amandmani Mire Grabovca. Rezultati glasanja su slijedeći:

Amandman I – ZA 4, protiv 21, suzdržanih 7;

Amandman II – ZA 4, protiv 21, suzdržanih 8;

Amandman III – ZA 4, protiv 22, suzdržanih 6.

Pošto se izjasnio o amandmanima, Predstavnički dom je jednoglasno (sa 33 prisutna poslanika) usvojio Zakon o izmjenama i dopunama Zakona o carinskoj tarifi Bosne i Hercegovine u tekstu kako je predložilo Vijeće ministara.

Uz Zakon Dom je usvojio zaključak da se obavezuje Vijeće ministara da do kraja februara 2001. godine pripremi Prijedlog zakona o izmjenama i dopunama Zakona o carinskoj tarifi, uvažavajući raspravu na Domu i podnesene amandmane, kao i u dogovoru sa privrednim komorama, vladama entiteta i drugim subjektima za koje ocijene da je potrebno koordinirati.

Zaključak je usvojen jednoglasno.

S obzirom da je Dom naroda usvojio Zakon sa određenim amandmanima, Predstavnički dom je imenovao Seada Avdića, Mariofila Ljubića i Željka Bilbija u Zajedničku komisiju oba doma radi postizanja sporazuma o jedinstvenom tekstu Zakona o izmjenama i dopunama Zakona o carinskoj tarifi.

#### **Ad. – 4:** Prijedlog zakona o važnosti javnih isprava u Bosni i Hercegovini (drugo čitanje)

Predsjedavajući je podsjetio poslanike na izvještaj nadležne komisije, kao i na amandmane Kluba poslanika PDP-SNS-SNSD/DSP-SPRS i Mirka Banjca, koje brane u plenarnoj fazi.

U ime Kluba poslanika PDP-SNS-SNSD/DSP-SPRS Željko Bilbija je obavijestio Dom da povlači prethodno podnesene amandmane iz razloga što je spoznao da bi oni remetili skladnost zakona, a da u ime Kluba podnosi novi amandman na član 1. tačka 2.

U diskusiji povodom amandmana učestvovali su Hilmo Neimarlija i Mirko Banjac, a potom se Dom o amandmanima izjasnio.

ZA amandman Kluba poslanika PDP-SNS-SNSD/DSP-SPRS glasalo je 19, protiv 18, suzdržala se 2 poslanika.

ZA amandman Mirka Banjca glasalo je 10, protiv 19, suzdržana 2.

Prema tome, amandmani nisu usvojeni.

Potom se Dom izjasnio o Prijedlogu zakona.

Od 32 prisutna, ZA su glasala 22, protiv 5, suzdržala se 4 poslanika.

Glasajući po entitetima, iz Republike Srpske ZA su glasala 2, iz Federacije BiH 20 poslanika.

Predsjedavajući je konstatovao da Prijedlog zakona nije dobio entitetsku većinu i da ide na usaglašavanje.

**Ad. – 5:** Prijedlog zakona o Pravobranilaštvu Bosne i Hercegovine (prvo čitanje)

O Prijedlogu zakona nije bilo diskusije.

Predstavnički dom je jednoglasno, sa 29 prisutnih poslanika, usvojio Prijedlog zakona o pravobranilaštvu Bosne i Hercegovine u prvom čitanju.

**Ad. - 6:** Prijedlog zakona o registraciji pravnih lica osnovanih od institucija Bosne i Hercegovine (prvo čitanje)

Ni o ovom prijedlogu zakona nije bilo diskusije.

Sa 28 glasova ZA i jednim suzdržanim, usvojen je Prijedlog zakona o registraciji pravnih lica osnovanih od institucija Bosne i Hercegovine u prvom čitanju.

**Ad. -7:** Prijedlog zakona o deminiranju u Bosni i Hercegovini (prvo čitanje)

U diskusiji o Prijedlogu zakona učestvovali su poslanici Dušan Stokić, Boro Bjelobrč i Mirko Mijatović

Poslije diskusije Dom se izjasnio o Prijedlogu zakona o deminiranju BiH. Od 32 prisutna ZA su glasala 22 poslanika, protiv je glasalo 9. Po entitetima, iz Federacije BiH ZA je glasalo 20, iz Republike Srpske 2.

Predsjedavajući je konstatovao da Prijedlog zakona u prvom čitanju nije dobio entitetsku većinu i da ide u dalju propisanu proceduru.

**Ad. – 8:** Prijedlog zakona o slobodnim zonama u Bosni i Hercegovini (prvo čitanje)

O Prijedlogu zakona nije bilo diskusije.

Dom je jednoglasno usvojio Prijedlog zakona o slobodnim zonama u prvom čitanju.

**Ad. – 9:** Izvještaj Komisije za ljudska prava, imigraciju, izbjeglice i azil o posjetama jednom broju opština u Bosni i Hercegovini

Uvodno izlaganje u vezi s Izvještajem podnio je predsjedavajući Komisije za ljudska prava, imigraciju, izbjeglice i azil Osman Brka.

U diskusiji su učestvovali: Violeta Kamberović, Miloš Jovanović, Osman Brka, Mirko Banjac, Mariofil Ljubić, Dušan Stokić, Mustafa Cuplov, Muhamed Begović, Miro Grabovac, Senad Šarganović, Bahrija Osmanović, Boro Bjelobrč i Omer Filipović.

U diskusiji su pojedini članovi Komisije osporili da je Izvještaj s prijedlogom zaključaka jednoglasno usvojen i iznijeli primjedbe na pojedine zaključke, kao i na dio teksta Izvještaja. Tim povodom u diskusiji je bilo dosta replike i polemike.

Predsjedavajući Mirjanić je konstatovao da su članovi Komisije u diskusiji iskazali nejedinstvo o Izvještaju i o prijedlogu zaključaka, te se zbog toga Kolegij usaglasio da Domu predloži da Izvještaj vrati komisiji, sa zadatkom da, na osnovu rasprave i iznesenih prijedloga, za narednu sjednicu pripremi usaglašen Izvještaj s prijedlogom zaključaka.

Prijedlog Kolegija usvojen je sa 21 glasom ZA, 6 protiv i jednim suzdržanim – iz Federacije BiH ZA je glasalo 11, iz Republike Srpske 8.

**Ad. – 10:** Davanje saglasnosti za ratifikaciju:

- a) Sporazuma o razvojnom kreditu (Treći projekat obnavljanja u sektoru električne energije) između Bosne i Hercegovine i Međunarodne asocijacije za razvoj,
- b) Sporazuma između Bosne i Hercegovine i Islamske Republike Pakistan za unapređenje i zaštitu investicija,
- c) Trgovinskog sporazuma između Bosne i Hercegovine i Islamske Republike Pakistan.

U okviru ove tačke dnevnog reda diskutovali su Željko Bilbija, Marko Amidžić i zamjenik ministra, te Ivica Mišić, zamjenik ministra vanjskih poslova.

Poslanik Bilbija je prigovorio na neažurnost u dostavljanju sporazuma u Parlament radi davanja saglasnosti, pa se onda dešava da se traži hitna procedura zbog čega nema vremena da se obavi rasprava u nadležnoj komisiji. Zatražio je da se sporazumi ubuduće dostavljaju na vrijeme. Predložio je da Vijeće ministara Parlamentu dostavi pregled zaključenih sporazuma koji se odnose na zaštitu investicija i trgovinske sporazume – sa kojim državama su sporazumi zaključeni i sa kojima se ima namjera iste zaključiti, kao i da li ima sporazuma koji su zaključeni, a nisu ratifikovani.

Marko Amidžić je, pored ostalog, rekao da je Poslovnik Doma nedorečen kad je u pitanju procedura ratifikacije međunarodnih sporazuma i ugovora. Kao predsjedavajući Komisije za vanjske poslove zatražio je od Kolegija da uspostavi komunikaciju o ovim pitanjima na relaciji Predsjedništvo BiH – Vijeće ministara, te da ta tijela odrede osobe za komunikaciju sa nadležnim tijelima Predstavničkog doma. Naglasio je da je Komisija za vanjske poslove zaključila da neće razmatrati ni jedan materijal ukoliko sjednici ne prisustvuje neko od izvjestilaca, odnosno podnosilaca određenog materijala. Poslanik Amidžić je predložio da Dom usvoji zaključak da se od Vijeća ministara zatraži da sačini inventuru svih potpisanih, a neratifikovanih sporazuma i ugovora i da se na vrijeme dostavljaju Parlamentu, te da odrede osobe za komunikaciju sa nadležnim tijelima Doma.

Predsjedavajući Željko Mirjanić podsjetio je na pismo koje je Kolegij dobio 26. decembra iz Predsjedništva BiH u vezi sa Sporazumom pod a) i naglasio važnost da se taj sporazum usvoji na ovoj sjednici i da saglasnost za ratifikaciju. Istakao je da se radi o velikoj cifri sredstava koja su vezana za ratifikaciju ovog sporazuma i koja bi Bosna i Hercegovina mogla izgubiti u slučaju neblagovremene ratifikacije istog.

Zamjenik ministra vanjskih poslova, Ivica Mišić, zahvalio se predsjedavajućem Doma na njegovom apelu za izglasavanje saglasnosti za ratifikaciju sporazuma, naglasivši da je time prepoznao direktan i neposredan interes Bosne i Hercegovine, oba entiteta i sva tri naroda. Prihvatio je kritiku za sporost, odnosno kašnjenje u dostavljanju sporazuma u parlamentarnu proceduru, te naglasio da će poslanici dobiti kompletnu informaciju o stanju međunarodnih bilateralnih ugovora Bosne i Hercegovine.

Poslanici su prihvatili obrazloženje predsjedavajućeg Doma, te su jednoglasno dali saglasnost za ratifikaciju Sporazuma o razvojnom kreditu (Treći projekat obnavljanja u sektoru električne energije) između Bosne i Hercegovine i Međunarodne asocijacije za razvoj.

Predstavnički dom je također dao saglasnost za ratifikaciju:

- Sporazuma između Bosne i Hercegovine i Islamske Republike Pakistan za unapređenje i zaštitu investicija i
- Trgovinskog sporazuma između Bosne i Hercegovine i Islamske Republike Pakistan.

**Ad – 11:** Imenovanje članova Zajedničke komisije radi postizanja sporazuma o jedinstvenom tekstu Zakona o industrijskom vlasništvu u Bosni i Hercegovini

Dom je jednoglasno (sa 32 prisutna poslanika) imenovao poslanika Mariofila Ljubića, Seada Avdića i Mirka Banjca u Zajedničku komisiju oba doma radi postizanja sporazuma o jedinstvenom tekstu Zakona o industrijskom vlasništvu u Bosni i Hercegovini.

**Ad. – 12:** Poslanička pitanja i odgovori

Poslanička pitanja postavili su poslanici:

**Boro Bjelobrk:**

Izrazio nezadovoljstvo ignorantskim rukovodstvom Doma vezano za pitanja koje je postavio 19. maja.

Zatražio od Kolegija usmeno obavještenje što su preduzeli u vezi s njegovim pitanjem koje je na prošloj sjednici postavio rukovodstvu Republike Srpske vezano za posjetu Ruskoj Federaciji.

Predsjedavajući Mirjanić odgovorio je da je poslanik dobio odgovor, te ukoliko nije zadovoljan može ponovo postaviti pitanje.

**Osman Brka:**

Predstavnički dom obavijestio je da je dopisom od predsjedavajućeg Vijeća ministara zatražio informaciju u vezi s hapšenjem određenih građana Bosne i Hercegovine, za šta je od jednog broja građana i udruženja zatražio pomoć od Komisije. Naglasio je da odgovor Komisija još nije dobila, te je ponovo zatražio informaciju u vezi s ovim pitanjima, kako bi Komisija mogla odgovoriti građanima i udruženjima koji su zatražili zaštitu.

**Zoran Spasojević:**

Predložio je da Parlamentarna skupština, povodom novogodišnjih praznika, obezbjedi 57 paketića i da se daruju u neki dom za nezbrinutu djecu u Federaciji BiH i Republici Srpskoj. Rekao je da, ako od sredstava Parlamenta nije moguće, da to obezbijede poslanici.

Predsjedavajući Mirjanić je konstatovao da o ovom prijedlogu ne treba glasati, a da će Kolegij to riješiti.

Ovim je iscrpljen dnevni red 18. sjednice.

Zaključujući sjednicu predsjedavajući Mirjanić je, u ime Kolegija i u svoje ime, uputio čestitku za Novu 2002. godinu svim poslanicima, prisutnim gostima i predstavnicima sredstava informisanja, kao i građanima i narodima Bosne i Hercegovine.

Sjednica je završila rad u 18,45 sati.

Sastavni dio ovog zapisnika je transkript 18. sjednice Predstavničkog doma.

**S E K R E T A R**  
**PREDSTAVNIČKOG DOMA**  
**Branka Todorović**

**PREDSJEDAVAJUĆI**  
**PREDSTAVNIČKOG DOMA**  
**dr. Željko Mirjanić**